

Isiquiro pënëntërinso'

Yosë huënaráchin huënaráchin ya'notërinco'so'

1 ¹⁻³Caso Isiquiro corto hua'anco. Tatahuëso', Posi itopi. Papiro-nia'pa' canta', quëparinaco. A'na tahuëri a'napita quëpapisopitarë'co chachin Quiparoi' itopiso' yonsan'pa' nisarai. Inaquë nicasoco a'nanaya hua'narëso pochin pi'iro'të ni'sohuatohuachina, Yosë ya'norin ni'nahuë. Coaquin copirno quëpi quëran huarë' nani a'natëräpo pi'ipi, catapini yoqui nisarin. Naporahuaton nani cara shonca pi'ipitarin Napocotono copirno ya'coninso'. Naporo' Sinioroso' chiníquën nanantaton, a'notërinco'sopita nica'huaso marë' catahuarinco. ⁴⁻⁵Hua'narëso pochin norti parti quëran panca ihuan huë'sarin ni'nahuë. Naporahuaton panca chitoro quëran pën pipiarin ni'nahuë. O'coriro'sa pochin huënaratërarin. Ya'ipi ina chitoro tahuitërinso', panca huënaratarin. Pën huënaratërinso huancananta', hua'na huënaratërinso pochin ya'norin. Ina huancanachinta', catapini ma'sharo'sa piyapi pochin ni'topiso', ya'norin. ⁶A'naya a'naya catapini catapini ya'pirahuanpi. Cata-pini catapini chachin anpiantëhuanpi. ⁷Pa'huëquënpitaso', no'tënanconpi. Toroa'hua pochin tasërahuan nantëtopi. Nantëquënpitanta', sha'pi hua'na noyá so'narëso pochin ya'nopi. ⁸⁻⁹Napora-huatona piyapi pochin tanpatatona imirahuanpi. Anpiantëna pë'nacha ya'huëtopi. Anpiantënenä quëran nicarira'piapi. Pa'pachinara co niquë

tahuërëpihuë'. No'tëquën pa'pi. ¹⁰Ya'pi-rinënapitaso iso pochin ya'nopi: Notë-topi quëranso', piyapi pochin ni'topi. Inchinan parti quëranso', pa'pini pochin ni'topi. Ahuënan quëraonta', toro pochin ni'topi. Pinëna quëranso', panca onian pochin ni'topi. ¹¹Anpiantëna anquipiso', inapa po'tontapi. Cato quëran anpiantëna capini nicaripi. Cato quëran chachin nonëna nipa'shintopi. ¹²Ya'ipiya no'tëquën iratopi. Pa'pachinara, co nitahuërëtopihuë'. Insëquë-sona Siniorori chiníquën nanantaton quëpahuachina, inataquëchin pa'pi. ¹³Ma'sharo'sa pochin nipisopitaso', pënaya huënaratërinso pochin ya'nopi. Yanatëtë huënin huërintohuatëra, huënaratërin. Inapoatona', itohuaran itohuaran niya'contapiso pochin nisapi. Pënso' chiníquën huënaratarin. Ina quëran o'coriro'santa pipirantapi. ¹⁴Inapitaso' pa'pachinara, o'coriro'sa pochin co osharapihuë'. Pa'sahuatona', huënantapi. Inaporápi. ¹⁵Ina ma'sharo'sa nirarahué quëran ni'pirahuë', a'naya a'naya huanipiso pirayan a'nara tahuinan no'paquë ya'huërin. ¹⁶Catapini tahuinan chachin napopináchin nipi. Topacio itopiso' pa'ton na'pi quëran nipinan pochin huënaratopi. Naporahuatona niya'contëra'piapiso pochin ya'nopi ¹⁷Co tahuërëapona-raihuë', catapini parti quëran chachin nanitopi pacacaiso'. ¹⁸Tahuinano'saso', panca masho nisahuaton, huëhuëpi-ro ya'norin. Naporahuaton ya'ipi tahuirinso nani chachin ya'pirahuan-piapi. ¹⁹Ma'sharo'sa pa'pachinara,

tahuinano'santa pa'sapi. Inapatontahua-chinara, inahuanta inapatopi. ²⁰Yosëri chiníquën nanantaton insëchinsona a'pahuachina, inaquë pa'sapi. No'pa quëran notëhuachinara, tahuinano'santa notëpi. Tahuinano'santa inapitarë chachin nipinan ni'ton, napopi. ²¹Ma'sharo'sa pa'pachinara tahuinano'santa pa'sapi. Chiniconpachinara, inapitanta chiniconpi. No'pa quëran notëhuachinara, inapitanta notëpi. Tahuinano'santa inapitarë chachin nipinan ni'ton, napopi.

²²Motëna aipiso', a'tanamën pochin nininso' ya'norin. Potiriamia huënaratërinso pochin huënaratërin. ²³A'tanamën pochin nininsoanaquë, ina ma'sharo'saso anpiantëna anquipi quëran, itohuara capini nicaripi. Cato anpiantëna quëranso napoaponahuë', nonëna nipa'shintopi. ²⁴Pa'pachinara anpiantëna quëran tënëntopisonta natanahuë. Na'pihuanquë pamatohuachina, tënëntërinso pochin irinin. Yosë ya'ipi nanitaparinsó nonpachina, ya'caninsó pochin natanahuë. Naporahuatón panca sontaro'sa huëntón pa'pachinara, tënëntërinso pochin natanahuë. Chiniconpachinara, anpiantëna a'pamapi. ²⁵Motëna aipi, a'tanamën pochin nininso ya'huërin. Ina aipi quëran pa'pi chiníquën tënëntërinso' natanahuë. ²⁶Ina tënëntërinquë chachin a'nara hua'anëntacaso shira pochin ni'nahuë. Sapiro itopiso' pa'ton na'pi quëran nipinan pochin ni'nahuë. Inaquë huënsërinsona', a'nara piyapi pochin ya'norinsó ni'nahuë. ²⁷⁻²⁸Së'namën pëtëtëransó', hua'na soquihuachina huënaratërinso pochin ya'norin. Naporahuatón pën huënaratohuachina a'piánahuaninsó pochini, tahuitërin. Ya'huëre' së'namën pë'natëransó', pën nënë nënëtarinsó pochin ya'norin.

Pi'li pi'cataso' o'nanpachina yahua'tan ya'norinsó pochini ya'ipi tahuirapitërin. Ina pochin huënarataton Yosë noya noya nininsó ya'notërinco. Ina nicato isonahuë. Isonahuë quëran no'paquë huarë' monshomarahuë.

Pënënta'huaso marë' acorincoso'

2 ¹Ina quëran noninsó' natanahuë: “Piyapinquën nipiranhüë', huaniquë nonchinquën,” itërinco. ²⁻³Nontasonco chachin Yosë ispiritonën ya'coacantërinco ni'ton, ahuanirincó. Ina quëran nontaaantatonco: “Piyapinquën nipi-ranhüë', isirairo'sa nontacaso marë' a'paaranquën. Inapitasó' co natëtono'sahuë' nicatona', co yanatërinacohüë'. Shimashonënapita pochachin ni'tona', ipora tahuëriquë huarënta co yanatërinacohüë'. ⁴⁻⁵Hui'ninapitanta co natan-tochináchinhüë' cancantopirinhüë', inapita pënënacaso marë' a'paaranquën. Pa'patan, ‘Siniro pënënatëntquëma naporin,’ tosan. Napotopiranhüë tëranta co a'na natëponënhüë' nimara. Ama ina na'con na'con yonquiquësó-hüë'. Co natëtopirinhüë', co inapita naniantatorahuë pënëntona'piro'sa quëran pënënahüësó tëhuëchinso' yonqui'ina'. ⁶Piyapinquën nipiranhüë', ama inapita të'huatëquësóhüë'. Ma'sona itohuachinëonta', ama të'huaquësóhüë'. Nahuano'sa', yonpincaro'sa', inapita huáncana ya'huëaransó pochin cancantaran. Inapopiranhüë', ma'sona itohuachinën ama të'huaquësóhüë'. No'huitatona nishinahuën ni'tohuachinanta', ama të'huatëquësóhüë'. Co natantochináchinhüë' cancantopirinhüë', ama të'huatëquësóhüë'. ⁷Carinquën sha'huitohuatëntquën sha'huitëquë'. Co natantochináchinhüë' cancantopi ni'ton, co a'na natëponënhüë' nimara.

⁸Sha'huitaranquénso' noya natanquë'. Ama quëmaso' inapita pochin cancantëquësohuë'. Iporaso' nahuërahuaton iso quëtaranquénso' ca'quë'," itërinco.

⁹Napotohuachincora ni'pirahuë', a'nara so'nampi quiricaquë ninshito-piso', ihuëtarinco ni'nahuë'. ¹⁰Oporian-tohuachincora ni'pirahuë', sëtatona oshaapiso', co napion ancantatona', jma'huántacha ninai paya! topiso', parisitona tarëtopiso', inapita catoran chachin ninshitopinan ya'huërin.

3 ¹Naporo' sha'huitatonco: "Quëmaso' piyapinquën nipiranhüë', iso ninshitopiso' ca'quë'. Ina ca'sahuaton israiro'sa pënënacaso marë' paquë'," itërinco. ²Napotohuachincora nahuërahuë ni'ton, inanta quirica a'carinco. ³Ina quëran itaantaponco: "Iso ninshitopiso' natëaquë huarë' ca'quë'," itërinco.

Napotohuachincora, ninoi' pochin cashi cashin ca'nahuë. ⁴Naporo chachin itaantarinco: "Paaton israiro'sa yonquirahuëso sha'huitonquë'. ⁵Co sacai nanan nonpisopita ya'huëpique a'paranquënhüë'. Israiro'sa ya'huëpique a'paaranquën. ⁶Co notohuaro' naciono'sa', sacai nanan nonpique a'paaranquënhüë'. Inaquë a'paranquën naporini, co natananchitonhuë'. Napoaponahuë', inapitatuquë a'paaranquën naporini, inapitaso natëitënenquënhüë'. ⁷Israiro'saso nimirinhuë', co nohuantapihuë' natëinënso'. Ca chachionta co nohuantopihuë' natëinacoso ni'ton, napotarinen. Ya'ipi inapitaso', co natantochináchinhuë' cancantopi. ⁸Co natëpirinënhüë', ca nohuanton quëmarinta inapita pochachin cancantaton pënënarán. ⁹Tiamanti na'piso' pa'pi tarítón. Ina tarítërinso pochin quëmantata acoaranquën. Na'pi tarítërinso pochin acoaranquën ni'ton, ama inapita të'huatëquësohuë'. Co

natantochináchinhuë' cancantopi ni'ton, pënënpatan nishinahuën ni'tapona'. Napopirinhahuë tëranta', ama të'huatëquësohuë'," itërinco.

¹⁰Ina quëran itaantarinco: "Apira sha'huitohuatënhüë' noya huëratëhuanaton natanquë'. Naporahuaton yonquinën quëran nitotëquë'. ¹¹Israiro'sa ya'huëpi quëran quëpiso', ni'contaquë'. Pënënpatan co a'na natëponënhüë' nimara. Napoaponahuë': 'Sinioro pënënatënhüë' quëma naporin,' itonquë'," itërinco.

¹²Naporo chachin Yosë ispiritonën otërinco. Pinëhuë quëranso napoaponahuë', panca ocohua pa'pachina irininsó pochin natanahuë. Sinioro ya'notërinco quëran niotëhuachina naporin. ¹³Ma'sharo'sa pochin nipi-sopita anpiantënená quëran yanpona-pona nicaripiso', tahuinano'sa inahua pirayan ya'huërinso', inapita naporin. Panca ocohua irininsó pochin irinpi. ¹⁴Yosë ispiritonën otërahuatonco, ina quëran ocoirincó. Napotohuachincora, sëtërahuë, no'huitërahuë, naporahuë. Sinioro chiniqué' nanantaton quëpa-huachincora naporahuë. ¹⁵Israiro'sa ya'huëpi quëran quëpisopitaso', Quiparoi' yonsanquë, Tira-pito ninano itopiquë ya'huëpi. Inaquë acohuachincora, canchisë tahuëri inapitarë'co ya'huërahuë. Napoaporahuë', co nitotërahuë ma'sona nica'huaso'. Ma'sha ta'cahuasonta', co nitotërahuë'.

**A'paitona'pi pochin
nicaca'huaso marë'
Yosë acorincoso'**

¹⁶Canchisë tahuëri nanihuachina Sinioro nontaantatonco: ¹⁷"Quëmaso' piyapinquën nipiranhüë', a'paitona'pi pochin nicamaso marë' carinquën acoranquën. Ma'sona israiro'sa yasha'huitohuato, nanan quëtaranquën

inapita niyátainpichin ya'huëcaiso maré' sha'huitaran. ¹⁸A'naquën co noyahué' nininso maré': 'Iso', chiminacaso ya'huërin,' tosarahuë. Napotohuato, quëma nanan quëtaranquën co noyahué' nininso' a'pocaso maré' sha'huitaran. Natëhuachinquën co chiminaponhué'. Co sha'huitohuato-sohué', tëhuëchachin chiminapon. Napoaponahué', chimininso maré' quëma na'intarinquën. ¹⁹Sha'huitopiranhué' inachachin nisápachinso', inaso' oshanën maré' chiminapon. Quëmaso napoaponahué', ina chimininso', co na'intarinquënhué'. ²⁰A'na tahuëriso nipirinhué', a'naquën noya nicacaso no'quiponahué', amirahuaton co noyahué' nisarin. Tënihuato cá quëran a'potochináchin cancantarin. Inapoaso' co quëmari sha'huitohuatanhué', chiminapon. Hua'qui noya nipirinhué' tëranta', co ina maré' nicha'ësarahué'. Oshanën maré' chiminacaso ya'huërin. Quëmaso napoaponahué' co sha'huitëranhué' ni'ton, ina chimininso', na'intarinquën. ²¹Quëmaso co napoatonhué', ina piyapi sha'huitëran. Napotëran ni'ton, co huachi oshahuanpachinhué', co chiminaponhué'. Sha'huitëranso' natërin ni'ton, noya cha'ësarín. Ina maré' quëmanta noya cha'ësan," itërinco.

Yosë anë'huërinco

²²⁻²⁵Inaquë chachin Siniro sè'huarahuatenco itaponco: "Huanirahuaton canonquë paquë'. Inaquë yonquirahuëso sha'huichinquën," itërinco. Napotohuachincora, inatohua pa'nahuë. Inaquë nipatëra, Quiparoi' yonsanquë quënanahuëso pochachin, Yosë huënaráchin huënaráchin ya'norinso' ni'nahuë. Ina nicato isonahuë. Isonahuë quëran no'paquë huaré' monshomarahué.

Yosë ispiritonënso napoaponahué', ya'coancantatonco ahuanirínco. Ina quëran Siniro nontatonco: "Paaton pëinënquë nioncorapiquë'. Ni'quë'. Ama israiro'sarë'quën pa'sápamaso marëhué', nonino'saquë tonpoarinën. ²⁶Naporahuaton ca nohuaton nënëranën piracotënhuë chinpiapon ni'ton, co nonsaranhué'. Inapitaso' co natantochináchinhué' cancantopirinhué', co nanitaranhué' pënënamaso'. ²⁷Napoaponahué', ma'sona yasha'huitohuatënhuë noya noantaran. Naporol' quëmarinta': 'Siniro pënënatonpoa naporin,' itaran. Insosona yanatanpachinquën noya natanapon. Insosona co yanatanpachinquënhuë', co natanaponhué'. Co natantochináchinhué' cancantopi ni'ton, napoapona," itërinco.

A'naya a'naya oshanëni na'intarinso'

18 ¹⁻²A'na tahuëri Siniro nontatonco: "Israiro'sa ya'huëpique nonpachinara, ipora huanta naporapi: 'Pa'pina tëhuëpiso maré' hui'ninpita parisitopi,' tosápi. Ama huachi ina pochin noinasohué'. ³Ca Siniroco nanpiárahue ni'ton, no'tëquën sha'huitaranquëma'. Ipora quëran huaré' co huachi israiro'sanquëma', ina pochin nonsaramahué'. ⁴Ya'ipi piyapiro'sa cari hua'anëntërahuë. Mashoro'santa hui'ninarë chachin hua'anëntërahuë. Insosona co noyahué' nicaton oshahuanpachin, inaso' chiminapon.

⁵Noya nina'piso', no'tëquën yonquiaton noyasáchin ninin. ⁶Co motopia'huaro'saquë mamanshi moshacaso maré' ma'sha acopiso' ca'patërinhué'. Co inapitari catahuacaso ninarinhué'. Co sa'ina ca'patërinhué'. Sa'in inachintërinso quënanpachina, co tëcaririnhué'. ⁷Co a'napita

aparisitërinhuë'. Nihuiipsisopitari: 'Pahuërea'huanquënso' nitotacaso marë', iso ma'sha quëchinquën,' itatona quëtopirinahuë', ayantaantarin. Co insonta ihuarinhuë'. Piyapi'sa tanahuachinara, a'carin. Capa a'mocaiso nipachina, quëtërin. ⁸Coriqui a'nanpachinaranta', co na'con na'con ananpërinhuë'. Co a'napita ma'sha onpotërinhuë'. Noya coisë pochin nicon, a'naya a'naya no'tëquën sha'huirapirin. ⁹Pënëntërahuëso chachin nissarin. Ya'ipi camaitërahuësopita no'tëquënáchin natërin. Naporin. Naponap'iso', noya quëmapi. Naporinso marë' inaso nanpipon. Ca Sinioroco sha'huitaranquëma'.

¹⁰⁻¹¹Ina pochin quëmapi niponahuë', hui'ninso' no'huitëraya nisahuaton tëpaton. Co pa'pin naporinsopita nininhuë'. Motopia'huaro'saquë mamanshi moshacaso marë' ma'sha acopiso' ca'patërin. Sa'ina ca'patërin. ¹²Popriyaro'sa co nosoroatonhuë', aparisitërin. Ihuatërin. Nihuiipsisopitari: 'Pahuërea'huanquënso' nitotacaso marë', iso ma'sha quëchinquën,' itatona quëtohuachinara, co ayantaantarinhue'. Mamanshiro'sa chinotërin. Co costarahuësopitahuë' ninin. ¹³Coriqui a'nanpachinaranta', na'con na'con ananpërin. Ina pochin nipachina', co nanpicaso ya'huërinhuë'. Ya'ipi inapita co costapirahuë', naporinso marë' onpopionta chiminapon. Inaora tëhuënëncuë napoapon.

¹⁴Ina pochin quëmapi niponahuë', hui'nahanpachina, hui'ninso' nishatërin. Pa'pin naporinsopita nicaponaahuë', co ina pochin nininhuë'. ¹⁵Co motopia'huaro'saquë mamanshi moshacaso marë' ma'sha acopiso' ca'patërinhuë'. Israiro'sa nisha nisha mamanshi chinotopi. Inaso', co inapita chinotërinhuë'. Co sa'ina ca'patërinhuë'. ¹⁶Co a'napita aparisitërinhuë'.

Nihuiipsisopitari: 'Pahuërea'huanquënso' nitotacaso marë', iso ma'sha quëchinquën,' itatona yaquëtopirinahuë', co nohuanterinhue'. Co insonta ihuarinhuë'. Piyapi'sa tanahuachina a'carin. Capa a'mocaiso nipachina, quëtërin. ¹⁷Co a'napita ma'sha onpotërinhuë'. Coriquinën a'nanpachinaranta', co na'con na'con ananpërinhuë'. Pënëntërahuëso chachin nissarin. Ya'ipi camaitërahuësopita no'tëquënáchin natërin. Naporin. Naporinsoso', nanpipon. Co pa'pin oshanën marë' chiminacaso ya'huërinhuë'.

¹⁸Pa'pinso' a'napita aparisitërin, ihuatërin, ya'huërinquë co noyahuë' ninin, naporin. Inapoaton oshahuanin ni'ton, chiminacaso ya'huërin. ¹⁹Ina yonquiatoma canpitaso': '¿Onpoatonta co noyahuë' nina'pi hui'ninso' pa'pin oshanën marë' co ana'intëranhuë'?' itapomaco. Hui'ninso noyasáchin nicon, no'tëquën natërinco. Pënëntërahuësopita ya'ipi natërin. Napoaton nanpicaso ya'huërin. ²⁰Insosona oshahuaninso', inaora chachin chiminacaso ya'huërin. Co pa'pin oshanën marë' hui'nin ana'intacaso ya'huërinhuë'. Inapochachin hui'nin oshanën marënta', co pa'pin ana'intacaso ya'huërinhuë'. Noya nipi-sopitaso', noya nipiso marë' no'tëquën acanapo. Co noyahuë' nina'pinta', co noyahuë' nininso marë' no'tëquën ana'inta'huaso ya'huërin,' itërinco.

Sinioro, noya coisë pochin nininso'

²¹Ina quëran Sinioro taantarin: "Co noyahuë' nina'pinta oshanën a'porahuaton, ya'ipi pënëntërahuëso' natëhuachin, co chiminaponhuë'. Noyasáchin nicon no'tëquën natë-rincoso marë', nanpipon. ²²I'hua pa'pi co noyahuë' nipirinhue', ya'ipi

naporinso naniantarahuë. Noya nisarin ni'ton, ina marë' nanpipon. ²³Co noyahuë' nipsisopita chiminacaisoso', co nohuantërahuë'. Co noyahuë' nipiso naniantatona', noya niina'. Napohuachina tëhuënchachin nanpipona'. Ca Sinioroco sha'huitaranquëma'.

²⁴Noya nina'pinta noya nisarinsco a'porahuaton, co noyahuë' nininso', no'huípiro nininso', inapita niantahuachin: 'Onpopionta inaso', Siniorori nanpicaso' quëta'pon nimara,' jama tocosohuë'! Noya nininsopita co huachi yonquiarahuë'. Co casáchin cancantatoncohuë', oshahuaninso marë' chiminapon. ²⁵Napohuatora canpitaso': 'Sinioroso', co noyahuë' nisarin,' tēcaponoma a'na nimara. Napopiramahuë', ¡canpita mini tëhuënchinso' co no'tëquën yonquiatomahuë', co noyahuë' nisarama'! ²⁶Noya nina'pi nipirinhüë', noya nisarinsco a'porahuaton co noyahuë' nipachin, co noyahuë' nininsopitari na'intarin ni'ton, chiminapon. ²⁷Napoaponahuë', co noyahuë' nipsisopita tëranta', co noyahuë' nipiso a'porahuatona noya nipachina', cha'ësapi. ²⁸'Tëhuënchachin co noyahuë' ninahuëso marë' Yosë ana'intincoso ya'huërin,' tēcaton co noyahuë' nininso' a'pohuachin, co chiminaponhuë', tëhuënchachin nanpipon.

²⁹Ina natanatona israiro'saso': 'Sinioro co noyahuë' nisarin,' tēcapona'. ¡Caso mini noya nisarahuë'! ¡Canpita tëhuënchinso' co no'tëquën yonquiatomahuë', co noyahuë' nisarama'! ³⁰Carimaso', a'naya a'nayanquëma no'tëquën yonquirapiranquëma'. Noya nipatama', noya ni'saranquëma'. Co noyahuë' nipatamaso', ana'intaranquëma'. Ca Sinioroco sha'huitaranquëma'. Ya'ipi co noyahuë' ninamasopita a'pochinaco huachi. Ama canpitaora tëhuënëmaquë

ta'huantamaso marëhuë' inapoco'. ³¹⁻³²Pa'pi co noyahuë' nicatoma na'con tëhuëtëramaco. Naporamaso', a'poco huachi. Nasha cancan ya'huëchinquëma'. Ispiritonta nasha chachin ya'huëchinquëma'. ¡Canpitaso israiro'sanquëma co chiminamaso ya'huërinhuë'! ¡Co caso nohuantërahuë inso tëranta chiminacaso'! ¡Co noyahuë' ninamaso' a'pohuatama', nanpiarama'! Ca Sinioroco sha'huitaranquëma'!" tēnin.

A'paitona'pi, ma'sona nicacaso ya'huërinso'

33 ¹A'na tahuëri Sinioro itaantarinsco: ²"Quëmaso' piyapinquën nipiranhüë', israiro'sa sha'huitacaso marë' nanan quëtaranquën: Ca nohuanton a'na no'pa'pa' quira nisahuachina', ya'huëhuano'saso a'nara sontaro a'paitona'pi nicacaso marë' huayonapi. ³Inaso' inimicoro'sa huë'sarin quënanpachin, piyapi'sa niyátainpichin ya'huëcaiso marë' pomonquë sha'huitarin. ⁴Inso tëranta a'paitona'pi pomon pihuirinso' natanaponahuë', co natëtohuachinhüë', inimicoro'sari huë'sahuaton tēpapon. Napohuachin, inaora tëhuënënquë chiminapon. ⁵Pomon pihui'piso' natanaponahuë', co natëtërinhuë'. Napoaton inaora tëhuënënquë chiminapon. Co insonta ina marë' nonsarinhuë'. Natëtërin naporini, cha'ëitonhuë'. ⁶A'paitona'piso', inimicoro'sa huë'sarinso nicaponahuë', co pomon pihuirinhüë'. Inapitaso canquirahuatona inso tëranta tēpahuachina', inaso', inaora oshanën marë' chiminapon. Napoaponahuë' ina chimininsco marë', a'paitona'pinta' ana'inta'huaso ya'huërin.

⁷Piyapinquën nipiranhüë', carinquën acoranquën israiro'sa pënënacaso marë'. A'paitona'pi pochin nisan.

Quëmaso inapita yonquirapirahuëso', nitotahuaton pënënarán. ⁸⁻⁹A'na piyapi co noyahuë' nipachin, chiminacaso sha'huitaranquën. Napotohuatënquën, co noyahuë' nininso' a'pocaso marë' quëmari sha'huitaran. Sha'huitopiranhuë co natëhuachinquënhuë', inaso' oshanën marë' chiminapon. Inapohuachin, co quëma na'intarinquënhuë'. Sha'huitacaso nipirinhuë', co sha'huitohuatansohuë', inaso oshanën marë' chiminapon. Napoaponahuë', ina chimininsó', quëma na'intarinquën," itërinco.

**A'naya a'naya oshanëni
na'intarinso'**

¹⁰Naquëranchin Siniro nontatonco: "Quëmaso' piyapinquën nipiranhuë', nanan quëtaranquën israiro'sa pënënacaso marë'. Napotëquë': "Canpitaso nonpatamara naporama': "Quiyaso' oshahuanatoi panca tëhuërai. Inapoatoi panca pë'pëtëraiso pochin nisarai. Napoaton nanpichinapoi chachin chanatëreso pochin nisarai. ¿Onporahuatoicha noya nicatoi ya'huë' nicaya?" tënama'. ¹¹Napopiramahuë', caso Siniroco ni'ton, no'tëquën sha'huitaranquëma'. Co caso nohuantërahuë co noyahuë' nipisopita chiminacaiso'. Co noyahuë' nipiso a'porahuatona nanpicaiso' nohuantërahuë. Israiro'sanquëma', co noyahuë' ninamasopita a'poco'. Ama chiminacamaso nohuantocoso'huë', tënin Siniro, itëquë'," itërinco.

¹²Naquëranchin Siniro israiro'sa sha'huitaantarín: "A'na quëmapi noya niponahuë' oshahuanpachin, i'hua noya nininsoari co nicha'ësarínhuë'. A'na piyapinta co noyahuë' niponahuë', co noyahuë' nininso' a'pohuachin, i'hua co noyahuë' nininsoari co na'intaponhuë'. Co ina marë' chiminaponhuë'.

Ina pochachin noya nina'pinta oshahuanantahuachin, i'hua noya nininsoari, nanpirápasó' co catahuaponhuë'. ¹³A'na piyapi noya nininso': "Quëmaso' noya ninanso marë' nanpipon,' itërahuë. Inaso napoaponahuë', napotërahuëso' yonquiaton: "Co ana'intaponcohuë'," tosarín. Ina tëcaton co noyahuë' niantarin. Napohuachin, i'hua noya nininso' co huachi yonquiarahuë'. Co noyahuë' nininso marë' chiminacaso ya'huërin. ¹⁴Ya'huëre' a'na piyapinta co noyahuë' nininso marë': "Quëmaso' chiminamaso ya'huërin,' itërahuë. Inaso napoaponahuë', oshahuaninsó a'porahuaton, noyasáchin nisarin. ¹⁵Ma'sha a'nantohuachin: "I'huëre'ta'huanquënso nitotacaso marë', iso ma'sha quëchinquën,' itatona quëtopiso', ayantërin. Ihuatërinson'ta', hua'anën chachin quëtaantarín. Pënëntërahuësopita piyapi'sari natëhuachina', inapitari ananpirin. Ya'ipi inapita no'tëquën natëton, co noyahuë' nininso' a'porin. Naporin. Napon'a'piso', co chiminaponhuë', tëhuë'nchachin nanpipon. ¹⁶Iporaso' noyasáchin nicaton no'tëquën yonquirin ni'quëhuare', nanpipon. I'hua co noyahuë' nicaton oshahuaninsó', co huachi pi'pian tëranta yonquiapohuë'. ¹⁷Ina yonquiatoma canpitaso israiro'sa': "Siniroso' co noyahuë' nisarin,' tapoma'. Napopiramahuë', canpita mini tëhuë'nchinso', co noyahuë' nisarama'. ¹⁸Quëmapi noya nisarin niponahuë', ina a'porahuaton co noyahuë' nipachin, naporinsó marë' chiminacaso ya'huërin. ¹⁹Co noyahuë' nina'pinta niponahuë', co noyahuë' nininso' a'porahuaton noya nipachin, naporinsó marë' nanpipon. ²⁰Naporahuëso marë' canpitaso': "Siniro co no'tëquën nisarinhuë'," taantarama'. Napopiramahuë', carimaso a'naya

a'nayanquëma', noya nipatama' acanaponquëma'. Co noyahuë' nipatamaso', ana'intaranquëma',” itërin.

Quirosarin ninano canapiso'

²¹⁻²²Quëninacoiso', nani shonca cato pi'i, shonca yoqui, a'natërápo tahuëri nisarin. Naporo' a'nara quëmapi Quirosarin quëran ta'airinso canquirin. Ina canquicaso a'na tashiíchin pahuanahuaso', Siniro ya'notërinco. Naporonta chiníquën nanantaton, ma'sona a'notërinco ni'ca'huaso marë' catahuaantarinco. Tahuërihuachina, quëmapi ta'airinso' nicaponco huëcaso chachin, Siniro nohuanton noya noantarahüë. Naporo quëran huarë' co huachi në'huërahuë'. Cantiirahuatonco, inimicoro'sari Quirosarin minsëpiso' sha'huitiirinco.

Israiro'sa oshahuanpiso'

²³Naquëranchin Siniro nontaantonco: ²⁴“Israiro'sa ninanonënapita inimiconënapitari ata'huantërin. Inaquë quëparitopisopitaso napopi: ‘Apranso' inaoraíchin niponahuë', ya'ipi iso no'pa' hua'anëntërin. Aquëtë huarë' canpoaso', na'aquënpoa nichinapon chachin iso no'pa' hua'anëntarihua', toconpi. ²⁵⁻²⁶Napopiso marë' quëmari ca Siniroco naporahuëso' sha'huitëquë': ‘Canpitaso ma'sha tëpahuatamara, co huënaïnën inquitapomarahüë' ca'nama'. Mamanshiro'sa mosharama'. Piyapi'sa tëparama'. Ma'sha nohuantohuatamara, a'naroáchin hua'na ohuararama'. Co costarahüësohuë', ninama'. Ya'ipinquëma nitëhuananpitërama'. Naporama'. ¿Inapoapomarahüë', iso no'pa' hua'anëntapoma ti?’ tënin Siniro,” itërinco.

²⁷Naporahuaton Siniro taantarin: ‘A'naquënso', ninanoro'sa tapipiquë

ya'huërapí. Ya'huëapirínahuë', inapitanta tëpaponá'. Ninanoro'sa aipiran ya'huëpisopitanta', ni'niro'sari capon. A'naquënso natëtëanaro'saquë, motopi nanino'saquë, inaquëpita ya'huëapi. Inapitanta chiníquën canioro'sa quëran chiminapona'. Ca Siniroco no'tëquën sha'huitaranquëma'. ²⁸⁻²⁹Ca nohuanton iso no'pa' tapimiatapona'. Napoaton tanahuantápon. Noya no'pa' hua'anëntatoma': ‘Ma noyacha no'pahuanai paya,' tënamaso', tapitaranquëma'. Israiro motopiro'saquë ya'huëpítopitanta tanahuantápon. Co huachi insonta inataquëchin na'huëaponhuë'. Pa'pi co noyahuë' nicatoma oshahuanamaso marë' ina pochin no'panëma acotaranquëma'. Naporo huarë' ca Siniroco ninahuëso', nitotarama',” tënin.

³⁰Canta', Siniro nontatonco itaponco: “Israiro'saso yonquiatënnëquën, ninano pairapipiso pirayan, pëi ya'coanaro'sa pirayan, inaquëpita ninontatona napopi: ‘Siniro Isiquiro quëran anitotërinpoaso', huëco pa'ahua natanhuan,' niitopi. ³¹Ninapotatona', huëcapairahuatënnë quëma notënanquë huënsëipi. Yáinapopi ni'ton, napopi. Sha'huitëransopita natanpirínahuë', co nohuantopihuë' natëcaiso'. Huaino cantahuachinara, yonquinëna quëran nitotopi. Inapochachin inahuanta nonansopita yonquinëna quëran nitotopitërapí. Cancanëna quëranso napoaponahuë', coriquisáchin cancantopi. ³²Inapitaso', arpa pi'niaton huaino míso cantarínso pochin cancantërinë. Natanpirínënhuë', co natërinënhuë'. ³³Co natëpirínënhuë', ya'ipi sha'huiransopita nanipon. Naporo huarë': ‘Tëhuëenchachin Isiquiro Yosë nohuanton no'tëquën pënnëpirinpoahuë', taponá’,” itërinco.

**Co noyahuë' hua'ano'sa
yonquiaton pënënsin'**

34 ¹A'na tahuëri Siniro nontaanta-tonco: ²“Quëmaso' piyapinquën nipiranhuë', Israiro no'paquë co noyahuë' hua'ano'sa ma'sona yonquirapirahuëso', sha'huitëquë': ‘¡Ma'huantacha Israiro hua'ano'sanquëma nisarama paya! Canpitaso', canpitaora nia'pairama! A'paitoro'saso', ohuicanënpita a'paicaiso ya'huërin. Inapochachin canpitanta', a'paitona'pi pochin Yosë acorinquëma', israiro'sa a'paicamaso marë'. ³Canpitaso nipirihuë', co a'pairamahuë'. Topinan sho'shoinëna o'otatë pochin nitërama! Inapita anporonëna quëran huaita nicatoma a'morama! Amoshin nipisopita tëpatoma ca'nama! ⁴Sanpatopisopita co catahuaramahuë'. Cania'pi nipisopita co nonënamahuë'. Pa'huëna ya'panpisopitanta', co nonëntatoma tonpotëramahuë'. Chihuëpisopita co yonitoma quënantaramahuë'. Ayapisopitanta', co yoniramahuë'. Co nosoroatomarahuë', ahuëanaquëranchin a'pairama! ⁵Piyapinëhuëpitaso' ohuicaro'sa pochin nipi. Co hua'anëna ya'huëtopisohuë pochin inahuara pa'sápi. Napoápatona yanquëëpi. Ni'niro'sari pë'yatë pochin nitërin. ⁶Motopiro'sa', motopia'huaro'sa', inaquëpita pa'sahuatona yanquëëpi. Ya'ipi isoro'paquë chihuëatona', pa'sápi. Napoápirinahuë', co macari tëranta yonicaso yonquirinhuë'.

⁷Napoaton canpita hua'ano'sanquëma nontaranquëmaso', natanco! ⁸Ca Siniroco ni'ton, no'tëquën sha'huitaranquëma'. Ohuicanënhuëpita co hua'anëhuanhuë' nipiso marë' nisha nisha ni'niro'sari pë'yapi. Hua'anënpita ya'huëtaponaraihuë', co inahuari a'paipi-huë'. Inahuaso', inahuarasa' nia'payatë

pochin niconpi. ⁹⁻¹⁰Hua'ano'sanquëma'. Carima canpitaso', piyapinëhuëpita a'paiamaso marë' acoranquëma'. Ina marë' acopiranguëmahuë', co piyapinëhuëpita a'pairamahuë ni'ton, natanco sha'huichinquëma': Caso Sinioronëmaco nipirahuë', inimiconënhuëpita pochin ni'nanguëma'. Na'a ohuicanënhuëpita a'paicamaso marë' acoranquëma'. Acopiranguëmahuë', ayatëramaco ni'ton, canpita pahuë-rëamacoso ya'huërin. Inapita a'paicaso marë' acopiranguëmahuë', ama canpitaorasas' nia'pairápamaso marëhuë', ocoiranquëma'. Ocoiatënguëma ohuicanënhuëpita, osërëtaranguëma'. Ama capatoma pë'yarápamaso marëhuë' napotaranquëma', itëquë',” itërinco.

Noya hua'anën pochin nininso'

¹¹Naquëranchin Siniro taantarin: “Ca Siniroco sha'huitaranquëma'. Hua'ano'sanquëma'. Canpitaso piyapinëhuëpita co noya a'pairamahuë ni'ton, cari chachin a'pairahuë huachi. ¹²Noya hua'anënsa', ohuicanënpita yanquëëhuachina, co napion cancantërin. Inapochachin canta', piyapinëhuëpita nicha'ëanta'huaso marë' co napion cantarahuë'. Inapitaso' pa'pi tashirotatón huiraitërinso tahuëri itohua itohua yanquëëpi. ¹³⁻¹⁴Nisharo'sa no'panëna parti quëpapirinahuë', cari ocoiantarahuë. Yontoantarahuato, ya'huëpiso no'paquë chachin quëantararahuë. Israiro no'paquëso noya ya'huëchináchin na'a motopiro'sa', i'sharo'sa', inapita ya'huërin. Inaquë noya noya pastoro'sa ya'huërin. Inaquë noya coshatapona', chinotapona', napoapona'. Inaquë ya'huëantacaiso marë' quëantararahuë. ¹⁵⁻¹⁶Caora chachin ohuicanënhuëpita a'pairahuë. Nani coshatohuachina', chinotacaiso

marë' quëpaantarahuë. Chihuëpiso-pita yonisarahuë. Ayapisopitanta', maantarahuato quëantararahuë. Pa'huëna ya'panpachina', tonpotarahuë. Cania'pi nipsisopitanta', nonënarahuë. Amonëno'sa', chiníquëno'sa', inapita quëran huarë' noya a'pairahuë. Ya'ipi inapita no'tëquën a'pairahuë. Ca Sinioroco sha'huitaranquëma'.

¹⁷⁻¹⁸Isonta', ca Sinioroco chachin sha'huitaanta'inquëma': Ohuicanëhuëpita pochin ninamasopita natanco: A'na tahuëri carima no'tëquën sha'huitaranquëma'. A'naquëmaso', ohuica pochin nicatoma co onpopinchin chinirama-huë'. A'naquëmanta', carniro pochin, chipo pochin, inapita pochin nicatoma chiníquëno'sa ninama'. Chiníquëno'sanquëmaso', noya noya pasto ca'nama'. ¡Co ca'namasoso', co to'pi to'pichitomahuë'! Noyai' nininso' o'orama'. ¡Co o'oramasoso', co to'moitatoma në'huëichitomahuë'! ¹⁹Ohuicanëhuëpitaso', pasto to'pi to'pitëramaso', ca'pi. I'shanta anë'huëitëramaso', o'opi. ²⁰Naporamaso marë' a'na tahuëri noya coisë pochin nicato, amonëno'sa ana'intarahuë. Nansëyaro'saso nipirinhuë', catahuararahuë. Ca Sinioroco napotaranquëma'. ²¹Amonënuëmaso', ohuicanëhuëpita co onpopinchin chinipisopitahuë', panirahuatoma a'parama'. Pomonëma quëran ohuanahuatoma nita'atërama'. ²²Inapotopiramahuë', cari ohuicanëhuëpita nicha'ësarahuë. Co huachi ihuarápaiso ya'huëaponhuë'. Ca chachin noya coisë pochin nicato pa'poyapo. ²³Ca nohuanto piyapinëhuë Tapi itërahuëso', huënantapon. Inafchin ya'ipi ohuicanëhuëpita noya a'paiapon. ²⁴Ohuicanëhuëpitaso', casáchin chinotaponaco. Piyapinëhuë Tapi itërahuësoari hua'anën nisarin. Ca Sinioroco sha'huitaranquëma'. ²⁵Noya ya'huëcaiso

marë' inapitaro'co anoyatarahuë. Ca nohuanton ni'niro'sa ayapon. Ama ohuicanëhuëpita apicaíso marëhuë' napoapon. Inapohuato tanano'saquë topinan huë'ëpona'. Co manta të'hua-tapihuë'.

²⁶Hua'anënta'huaso marë' motopi acorahuëso' tahuirinquë, ohuicanëhuëpita acoarahuë. Cari chachin catahuarahuë ni'ton, nohuantasoi chachin o'nan ya'huëta'pona'. ²⁷Nararo'santa', notohuaro' nitapon. Sha'pisopitanta hua'huayátërahuë macapona'. Napoatona ohuicanëhuëpitaso', ya'huëpique chachin co të'huarë'na ya'huëapona-huë'. Nisha nisha parti piyapinëhuëpita asacatacaíso marë' quëpapirinahuë', cari nicha'ësarahuë. Inapotohuato, ca Sinioroco ninahuëso' nitotapona huachi. ²⁸Co huachi nisha piyapiro'sari hua'anëntapihuë'. Co ni'niro'sari tëranta caponahuë'. Co incari tëranta a'payanaponhuë ni'ton, co huachi të'huarë'na ya'huëaponahuë'. ²⁹No'panënaquë sha'tohuachina', noya noyatapon. Co huachi tarëtapihuë'. Co inso nacionquë ya'huëpisopitari tëranta', piyapinëhuëpita yonquiatona tëhuaponahuë'. ³⁰⁻³¹Naporo' inapitanta', israiro'sa piyapinëhuëpita ni'ton, yacatahuarahuëso nitotapona'. Naporahuaton Sinioroco ni'to, Yosënëna ninahuëso', nitotapona'. Israiro'sanquëma', canpitaso ohuicanëhuëpita pochin ninama'. Pastonëhuëquë chachin so'sopiso pochin ninama'. Caso nipirinhuë', Yosënëmaco. Ca Sinioroco sha'huitaranquëma', tënin.

Israiro'sa noya noya acoantarinsó'

36 (A'na tahuëri Sinioro nontatonco: "Israiro'sa ya'huëpique chachin ya'huëapona', co noyahuë' nipi. Inapoatona no'pa' quëtërahuëso

tapipi. Napopiso marë' no'huirahuë. Ana'intato nisha nisha no'paro'saquë a'parahuë. Napoaponahuë', insëquësona pa'piquë piyapi'sa naponin yonquirapirinaco: 'Isopitasa Sinioro piyapinënpita nipirinahuë', ya'huëpiso no'pa quëran ocoipi,' topi. Napoatona piyapi'sa co noyahuë' yonquirapirinaco ni'ton, sëtërahuë," itërinco.)²²⁻²³ Napoaton Sinioroso' israiro'sa nonta'huaso' camairinco: "Sinioro naporin: 'Canpitaso' co nisha'ëahuanquëmaso' inashitëramahuë'. Napoaponahuë', canpita na'in quëran nisha nisha parti quëparinëmaquë, piyapi'sa naponin yonquirapirinaco. Inapoatona tëhuarinaco. Napoaton napopiso' acopita'huaso marë' nisha'ë-saranquëma'. Inapotohuatënquëma', nisha nisha piyapi'saso' Sinioroco ni'to, chiniquënanantërahuëso nitotapi: "Israiro'saso', no'tën Yosë chachin chinotopi," tëcapona'. Ca Sinioroco ni'to, sha'huitëranquëmaso chachin nisarahuë.²⁴ Carima ya'ipi inapita no'paro'sa quëran ocoiaranquëma'. Nisha nisha piyapi'sa ya'huëpi quëran ocoirahuatënquëma', ayontonaranquëma'. Inapotatënquëma', ya'huëramaso no'paquë chachin quëpaantaranquëma'.²⁵ Canpitaso mamanshiro'sa moshatoma', në'huëtërinso pochin ninama'. Napoatoma co noyahuë' nipiramahuë'. Naporamaso', inquitaranquëma'. Në'mëtë në'huëtërinso', noyaiquë pë'sarëso pochin nitaranquëma'.²⁶ Nasha cancan quëtahuatënquëma', ispiritonta nasha chachin aya'coancantaranquëma'. Na'pi pochin co natantochináchinhuë' cancantopiramahuë', natëtochináchin cancan quëtëranquëma'.²⁷ Espiritonëhuë chachin aya'coancantaranquëma ni'ton, pënëntërahuësopita natëarama'. Nanamëhuënta natëarama'.²⁸ Shishonëmapita no'pa' quëtërahuëquë

ya'huëapoma'. Canpitaso piyapinëhuëpita nisarama'. Canta Yosënëmaco, nisarahuë.²⁹ Oshanëma inquitahuato, ama huachi inachachin nisápamaso marëhuë' catahuanranquëma'. Ca nohuanto notohuaro' trico na'apon ni'ton, co huachi tanarotaramahuë'.

³⁰ Ca nohuanton nararo'sa', sharo'sa', inapitanta na'con na'con nitapon. Ama a'napita naciono'sa ni'tonënuë, tanarotatoma taparo nicamaso marëhuë', napoarahuë.³¹ Naporo' co noyahuë' ninamaso', nishinahuën ninamaso', inapita yonquiatoma tapanapoma'.

³² Ama ninonpintocosoahuë'. Co canpita noya ninamaso marë' ina pochin acoaranquëmahuë'. Canpitaso co noyahuë' ninama ni'ton, tapanamaso ya'huërin.

³³ Caso Sinioroco sha'huitëranquëma': Canpitaso', oshahuanatoma në'huëtërinso pochin nipiramahuë', carinquëma inquitaranquëma'. Inapotohuatënquëma', ya'huëramaso ninanoro'saquë ya'huëantapoma'. Inapitaso' iráca tapitopirinënuëmahuë', anoyataantarama'.³⁴ Iráca ya'huëramaquëso', inimiconëmapitari tananhuantárin acopi. Inapotopirinahuë', inaquëranchin iminahuatoma sha'taantapoma'. Inapohuatama', ya'ipi na'huëro'sari nirápona'.³⁵ Ina nicatona': "Iso no'paso tananhuantápirinhuë'. Iporaso' sha'tantatona noya noya acopi. Itinquë nararo ya'huërinso pochin ya'norin. Ninanonënapitanta ata'huantatona tapitopirinahuë', iporaso' naquëranchin noya niacorapitona', ya'huëantarapi," tapona'.³⁶ Naporo' ya'huëramaso ya'cari ya'huërapisopitaso': "Ya'huëpiso no'pa' tapitopirinahuë', tëhuëchachin Sinioro' anoyataantarín. Paquiiri pa'pitatë pochin nitopirinhuë', naquëranchin shaantarëso pochin nitaantarín," tosapí. Ca Sinioroco naporahuë ni'ton, ina chachin nisarin.

³⁷Naporahuaton ma'marë tëranta nontohuatamaco, a'naroáchin catahuararanquëma'. Ca nohuanton notohuaro' na'asarama'. Panca huënton ohuicaros'a pochin nisarama'. Ca Sinioroco sha'huitaranquëma'. ³⁸Ninanonëmapita ata'huantatona tapitopirinëmahuë', pa'pi notohuaro' ya'huëantapoma'. Quirosarinquë pita tahuëri nanihua-chin, pa'pi notohuaro' ohuicaros'a Sinioro chinotatona tëpacaiso marë' quëpaapi. Inapochachin ninanonëmaquë na'apoma'. Inapotohuatënquëma', naní quëran ca Sinioroco ninahuëso' nitotapona', tënin," itërinco.

Nansëro'sa noyá yanipiso'

37 ¹Sinioroso' chini chiniquën nanantërin. A'na tahuëri inaso', ma'sona a'notërinco'so' ni'ca'huaso marë' catahuaantarinco. Ispiritonën noyá ya'coancantërinco ni'ton, a'na motopianaquë quëparinco. Inaquëso', piyapi nansë pa'pi notohuaro' yamorárin quënanahuë. ²Sinioro nohuanton ya'ipi ina motopiana itohuaran itohuaran pa'tërahuë. Ya'ipi ina nani chachin hua'huayátërahuë nansë', noyá yaní-toninso nírarahuë. ³Naporo' Sinioro itaponco: "¿Isopita nansëro'sa noya ipora nantianta'itonahuë' ti?" itërinco. "Quëmasáchin Sinioro inaso' nitotëran," itërahuë carinta'.

⁴⁻⁵Napotohuatora, Sinioro itaantarinco: "Carinquën nanan quëtaranquën iso nansëro'sa nontaton: 'Yaniransëro'sanquëma'. Sinioro naporinso natanco': "Ca nohuanton nantiantamaso ya'huëtarinquëma ni'ton, nantiantarama'. ⁶Pancarin ipatëro'sa', nosha, inapita acotaranquëma'. Sha'huëtënta ya'huëtarinquëma'. Inapotohuatënquëma', niinëhuë quëtaranquëma nantiantarama'. Inapotohuatënquëma', ca

Sinioroco ninahuëso anitotaranquëma'," tënin,' itëquë'," itërinco.

⁷Napotohuachincora, ina inachachin nansëro'sa nontërahuë. Nontasoco chachin, ocohua pa'ninso' natanahuë. Nansëro'santa', nansënëna capini nichinpitëra'piapi. ⁸Naporahuatona pancarin ipatëro'sa', nosha, inapita ya'huëtaantapi. Ina quëran sha'huëtënta ya'huëtaantapi. Napoaponaraihuë', co nanpiyátërapihuë'.

⁹Naporo' Sinioroso' nontaantatonco: "Carinquën nanan quëtaranquën ni'ton, niinëhuë përáquë': 'Catapini parti quëran chachin huë'sahuaton isopita chimipiro'sa ananpiquë', itëquë'," itaantarinco. ¹⁰Napotohuachincora, ina inachachin camairahuë. Napotohuatëra, nantiantarahuatona huanipi. Hua'huayátërahuë ni'ton, panca sontaro'sa huënton pochin ya'nopi.

¹¹Naporo' Sinioro nontaantatonco: "Israiro'saso', nansëro'sa ni'nanso pochin nipi. Ninontohuachinara: 'Nansëquënpoaso', noyá yanirinso pochin niconin. Co huachi ma'marë tëranta pa'tërëhuahuë'. Co huachi nimiriohuanhuë pochin niconëhua', niitopi. ¹²Inapitaso napopirinahuë', quëmari pënënaton: 'Sinioro napotërinquëma': "Canpitaso piyapinëhuëpitanquëma nipiramahuë', chimipiro'sa pa'pito-piquë acoatë pochin nitëranquëma'. Cari chachin pa'pitërinëquëma quëran ocoiatë pochin nitëranquëma'. Áquë quëpirinëquëmahuë', Israiro no'paquë chachin quëpanantaponquëma'. ¹³⁻¹⁴Pa'pitopinan pochin nisapiramahuë', ina quëran ocoiatë pochin nitëranquëma'. Inapotohuatënquëma', ya'ipi piyapinëhuëpitanquëma ca Sinioroco ninahuëso' nitotarama'. Cari chachin niinëhuë quëtohuatënquëma', nantiantarëso pochin nisarama'. Naporahuaton

ya'huéramaso no'paquë chachin acoan-
taranquëma'. Inapotohuatënquëma',
ca Siniroco sha'huitëranquëmaso
chachin nitëranquëmaso' nitotarama'.
Ca Siniroco napotaranquëma',” ténin
Siniro,' itëquë',” itaantarinco.

**Israiro'sa a'na huëntoínchin
niantacaiso ya'huërinso'**

¹⁵Ina quëran Siniro camayatonco:
¹⁶“A'nara nara masahuaton: ‘Iso Cota
huëntonquën,’ ta'caso ninshitéquë'.
A'na naraquënta ninshitaton: ‘Iso',
Israiro huëntonquën,’ itëquë'. ¹⁷Nani
ninshitohuatan, a'na imiraquëáchin
cato chachin së'quëquë'. A'naíchin
pochin nicacaiso marë' inapoquë'.
¹⁸Inaporanso yonquiatona', nata-
naponën: ‘¿Ma'ta tapon ina pochin
ninan?’ itaponën. ¹⁹Napotohuachinën:
‘Iso pochin Siniro anitotërinquëma':
“Israiro huëntonso Cota huëntonë', cato
huënton ya'huëpirinahuë', ca nohuanton
a'na huëntoínchin ya'huëapona huachi”
itërinquëma', itëquë'. ²⁰Ina quëran cato
naraquë ninshitéransopita a'ninquë-
chin ihuëquë'. ²¹Inaporahuaton sha'-
huitaantaquë: ‘Israiro'sa nisha nisha
nacionquë quëpapi ni'ton, itohua itohua
ya'huërapí. Cari chachin ya'ipi parti
quëran ayontonahuato ocoiarahuë.
Inapotahuato, ya'huëpiso no'paquë
chachin quëpanantarahuë. ²²Inaquë
nipachina', a'na nacioínchin nicapona
huachi. Israiro motopiro'saquë ya'huëa-
pona'. A'naíchin copirno ya'huëtapona'.
Co huachi cato nacion nisapihuë'. Co
huachi cato copirno ya'huëtapona-
huë'. ²³Naporahuaton co huachi amiro

mamanshiro'sa moshatona në'huëtë-
rinso pochin nisapihuë'. Co huachi
a'naratipita nicatona oshahuanapi-
huë'. Nisha nisha cancantopirinahuë'
nicha'ëpato, casáchin cancantaponaco
huachi. Ya'ipi oshanëna inquitahuato,
piyapinëhuëpita pochin ni'sarahuë.
Canta inapita Yosënëna nisarahuë.
²⁴Piyapinëhuë Tapi itërahuësoari
copirnonëna nisarin. Naporahuaton
inaíchin ohuicaros' hua'anën pochin
nicaton, piyapinëhuëpita a'pairarin.
Naporos' huarë' pënëntërahuësopita,
sha'huitërahuësopita, inapita natëpona'.
²⁵Piyapinëhuë iráca Cacopo itërahuëso',
no'pa' quëtërahuëquë ya'huëapona'.
Inaquë chachin shimashonënpitanta
ya'huëpi. Inaquë chachin canpitanta',
ya'huëapoma'. Hui'nama', shiparima',
inapitanta inaquë chachin ya'huapona'.
Co onporonta pipiaramahuë'. Piyapi-
nëhuë Tapi itërahuësoari hua'anëma
nisarin. Co a'nari ya'huëretaponhuë'.
²⁶Ama të'huarë'na ya'huëcaiso marëhuë',
inapitaro'co anoyatarahuë. Inapita-
ro'co anoyatarahuëso', ya'huëmiatarin.
Ca nohuanton notohuaro' na'apona'.
Naporahuaton chinotërinacoso pëi',
inapita ya'huëpiso huáncana acoarahuë.
²⁷Inapita huáncana ya'huëarahuë.
Inapitaso' piyapinëhuëpita nisapi. Caso
inapita Yosënëna nisarahuë. ²⁸Chino-
tërinacoso pëi acorahuëso', inahua
ya'huëpiso huáncana ya'huëmiatapon.
Napohuachina, a'napita nacion'saso':
“Tëhuëenchachin Siniro' israiro'sa
huayonin. Noya noya hua'anëntacaso
marë' naporin,” tapona', itaantaquë',”
itërinco.